

8. ԷՋՄԻԱՄՆԻ ԿԱԹՈՂԻԿՈՍՈՒԹԻՒՆԸ 1586—1626

Լէոնարդոս Սիդոնի եպիսկոպոսը, որ 1583 եւ 1584 տարիներուն բանակցութիւններ վարած է Էջմիածնի կաթողիկոսին հետ, իւր առ Սեքստոս Ա. Քահանայապետ 1587, Ապրիլ 15ին ներկայացուցած Տեղեկագրին մէջ այսպէս կը գրէ. «Մեծ Հայաստանի գլխաւոր կաթողիկոսն (il patriarca principale) է ներկայիս Գրիգոր, 85 տարեկան, որուն կաթողիկոսական դահակիցն (suo coadjutore nel suo patriarcato) է Առաքել եւ հարկերու վարձակալն (appaltatore delle esigenze) Դաւիթ<sup>1</sup>»: Կամենիցի տարեգիրը 1586ի համար կ'արձանագրէ. «ԹՎ. ՌԼԵ. տէր Դաւիթ կաթողիկոսն նստաւ. եւ զտէր Գրիգոր վարդապետն, որ էր Անկուրիոյ քաղաքին աթոռակալ, այս Ֆոանդաց աշխարհս նուիրակ ուղարկեց<sup>2</sup>»: Ուստի Դաւիթ աթոռակցութեան հրաւիրուած է 1585ի վերջերն եւ 1586ի սկիզբները: 1587ին Առաքել գրիչ ի Կարին կ'օրինակէ Աւետարան մը «ի հայրապետութեան տեսոն Ս. Աթոռոյն Էջմիածնայ տէր Գրիգոր կաթողիկոսին, տէր Առաքել կաթողիկոսին, տէր Դաւիթ կաթողիկոսին. այս երեքինս որ

<sup>1</sup> S. Baluzii Tutelensis Miscellanea, ed. Mansi. Lucae 1764, t. VI, էջ 150 եւ շար. Adolphe d'Avril, Relation de l'évêque de Sidon. Revue de l'Orient chrétien, III (1898), 200—216, 328—334 (գաղղ. թարգմանութեամբ), յատկապէս էջ 328: Հմմտ. Հ. Ղ. Ալիշան, Այրարատ, էջ 232: Ունիմ աչքի առաջ իտալերէն բնագիրը Արհիապ. Գոյունեանի օրինակութեամբ:

<sup>2</sup> Կամենից, էջ 54: